

Boerhavia foliis ovatis, floribus lateralibus compactis,
caule hirsuto procumbente Mill. dict. 4.

Raptim haec . Vale.

Upsaliae 1770. Jul. 25.

C. Linné.

52.

Viro amplissimo DD. Nic. Jacquinio.

Figura ista Bromeliae Karatas perplacuit, gratias ago
quod hanc orbi dare voluisti.

Cichorium pumilum profecto valde affine est *Cichorio
Endiviae*; an differat uti sylvestris ab hortensi diutius culta?

Mesembryanthemum cymbiforme habet multa affinia cum
Mesembr. falcato; sed in praedio constitutus, remotus ab
horto Botanico nondum dicam.

Sicca planta erat *Erysimum repandum*. *Trifolium* istud
acaule vocavi *Trif. apetalum*.

Asterem nullus facile determinet, nisi videat plantam
florentem et perfectam, forte etiam tum neque sine diffi-
cultate, pessimum est genus Asteris.

Allium pannonicum speciosissimum est in suo genere,
gratias ago pro bulbillis, sed quis vivat dum illi floreant,
vide quomodo differat ab *Allio Victoriali*.

Browalliae serantur in terra praegnante in olla, ut fa-
cilius dignoscantur, mitto utramque, cave ne varietates di-
cas, utramque per 30 annos distinctas colui.

Habeo tantum unicum specimen Dryadis pentapetalae
siccum, sed perfectissimum, ne credas Geum reptans esse,
quod vivum mihi est in Horto, habet Geum istud folia ly-
rata, lata, pubescentia, Dryas autem folia tenuiter laciniata,
glabra, quale omnino (ni fallor) a Lobelio pingitur.

Stupendum facinus committis edendo plantas more